



PATNUBAY SA MISA



22 Mayo 2022

Ika-6 na Linggo ng Pasko ng Muling Pagkabuhay

Taon K

Ang Puno ng Pag-ibig na Presensiya na nagbabago sa atin

Naaisip palang natin ay ang nalalapit na paghihiwalay sa isang taong mahal natin ay napupuno na tayo agad ng kalungkutan. Ganito rin ang nangyari sa mga disipulo, pagkatapos nilang malaman kay Hesus na hindi na nila siya makikita. Ngunit tiniyak ng Panginoon sa kanila na ang PAG-IBIG niya ang magpupuno sa kanyang paglisan at magbibigay sa kanila ng lakas at kapayapaan.

Pagkalipas ng dalawang libong taon, batid nating totoo ang kanyang sinabi. Siya ay laging narito sa Simbahan ang kanyang Katawang Banal. Tunay ngang kapiling natin siya sa pagdiriwang ng Banal na Eukaristiya. Buksan natin ang ating mga puso sa pagtanggap ng pag-ibig ng Banal na Santatlo sa pamamagitan niya at suklian ito ng pagpupugay ng ating mapagmahal na katapatan.



PASIMULA



Pambungad

(Ipahahayag lamang kung walang awiting nakahanda.)

Buong galak na ilahad upang marinig ng lahat ang ginawang pagliligtas ng Panginoong malakas. Aleluya ang ihayag!

Pagbati

P– Ang biyaya ng Panginoong Hesukristo, ang pag-ibig ng Diyos Ama, at pakikiisa ng Espiritu Santo ay sumainyong lahat.
B– **At sumaiyo rin!**

Pagsisisi

P– Sa pagtitipon natin dito bilang mag-anak ng Diyos tulad ng mga apostol sa Huling Hapunan, alalahanin natin ang pangangailangan natin sa pagpapatawad at kapayapaan ng Panginoon. (Manahimik sandali.)

P– Sa mga pagkakataong kami’y di naging tapat sa iyong salita, Panginoon, kaawaan mo kami!

B– **Panginoon, kaawaan mo kami!**

P– Sa mga pagkakataong isinara namin ang aming mga puso sa mga kaloob ng Espiritu at sa Kanyang inspirasyon, Kristo, kaawaan mo kami!

B– **Kristo, kaawaan mo kami!**

P– Sa mga pagkakataong di ka namin pinansin sa aming piling, Panginoon, kaawaan mo kami!

B– **Panginoon, kaawaan mo kami!**

P– Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B– **Amen!**

Papuri

B– Papuri sa Diyos sa kaitaasan at sa lupa’y kapayapaan sa mga taong kinalulugdan niya. Pinupuri

ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sa pagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P– Ama naming makapangyari-

This issue of *Patnubay sa Misa* may be downloaded for free anywhere in the world. A "love offering" for the continuation of our apostolate will be appreciated. Please, send your donation to "Word & Life Publications." Our Savings Account is BPI – # 3711-0028-46. Send us an email of a copy of the deposit slip with your name for proper acknowledgment. Thank You!

han, gawin mong sa masasayang araw na ito ng aming pagdiriwang sa pagkabuhay ni Kristo kami'y makaganap ng pagdiriwang na wagas upang ang aming ginugunita ay lagi naming matupad sa gawa sa pamamagitan ni Heskristo kasama ng Espiritu Santo magpasawalang hanggan.

PAGPAPAHAYAG NG SALITA NG DIYOS 

Unang Pagbasa Gw 15:1-2, 22-29

Sa Simbahan man ay di lagging maayos ang lahat. Maaaring magkaroon ng di pagkaka-sundo sa mga kasaping mabuti ang layunin. Makikita natin sa siping ito kung paanong nilutas ng matandang Simbahan ang mga gayong problema.

L—Pagpapahayag mula sa mga Gawa ng mga Apostol

Noong mga araw na iyon, may ilang taong dumating sa Antioquia, mula sa Judea, at itinuro sa mga kapatid ang ganito: “Kapag hindi kayo nagpatuli ayon sa Kautusan ni Moises, hindi kayo maliligtas.” Tinutulan ito nina Pablo at Bernabe at naging mainitan ang kanilang pagtatalo tungkol dito. Kaya’t napagkaisahang papuntahin sa Jerusalem sina Pablo at Bernabe at ang ilan pang kapatid sa Antioquia, upang makipagkita sa mga apostol at sa matatanda tungkol sa suliraning ito.

Kaya’t minabuti ng mga apostol, ng matatanda, at ng buong Simbahan na pumili ng ilan sa kanila upang suguin sa Antioquia, kasama nina Pablo at Bernabe. At sinugo nila ang mga pangunahin ng mga kapatid: si Judas na tinatawag na Barsabas, at si Silas. Ipinadala nila ang sulat na ganito ang nilalaman: “Kaming mga apostol at matatanda ay bumabati sa mga kapatid na Hentil sa Antioquia, sa Siria at Cilicia. Nabalitaan naming ginugulo kayo ng ilang kasamahang galing dini, bagamat hindi namin sila inutusan. Di-umano’y binabagabag kayo sa pamamagitan ng kanilang sinasabi. Kaya’t napagkaisahan naming magpadala sa inyo ng mga sugo. Kasama sila ng ating minamahal na Bernabe at Pablo, na di nag-atubiling itaya ang kanilang buhay sa paglilingkod sa ating Panginoong Heskristo.

Sinusugo nga namin sa inyo sina Judas at Silas upang ipaliwanag sa

inyo ang nasasaad sa sulat na ito. Sa udyok ng Espiritu Santo, ang naging pasiya namin ay huwag na kayong atangan ng iba pang pasanin maliban sa mga bagay na talagang kailangan: huwag kayong kakain ng anumang inihandog sa mga diyus-diyusan, ng dugo, at ng hayop na binigti. Huwag kayong makikiapid. Layuan ninyo ang mga bagay na ito, at mapapabuti kayo. Paalam.”

Ang Salita ng Diyos!
B—Salamat sa Diyos!

Salmong Tugunan Awit 67

B—Nawa’y magpuri sa iyo ang lahat ng mga tao! R. M. Velez



* O Diyos, pagpalain kami’t kaha-bagan, kami Panginoon’y iyong kaa-waan, upang sa daigdig mabatid ng lahat ang iyong kalooban at ang pagliligtas. **B.**

* Nawa’y purihin ka ng mga nilikha, pagkat matuwid kang humatol sa madla; ikaw ang patnubay ng lahat ng bansa. **B.**

* Purihin ka nawa ng lahat ng tao, purihin ka nila sa lahat ng dako. Ang lahat sa ami’y iyong pinag-pala. Nawa’y igalang ka ng lahat ng bansa. **B.**

Ikalawang Pagbasa Pah 21:10-14.22-23

Ang “Bagong Jerusalem” na inilalarawan ni Juan sa sipi para ngayon ay ang Simbahang sandigan ng mga apostol at tagapagmana ng bayang Israel.

L—Pagpapahayag mula sa Aklat ng Pahayag

Nilukuban ako ng Espiritu, at inihatid ako ng anghel sa ibabaw ng isang napakataas na bundok. Ipinakita niya sa akin ang Jerusalem, ang Banal na Lunsod, na bumababa mula sa langit buhat sa Diyos.

Nagliliwanag ito dahil sa kainingningan ng Diyos; kumikislap na gaya ng hiyas na haspeng sinlinaw ng kristal. Ang pader nito’y makapal at mataas at may labindalawang pinto,

bawat isa’y may bantay na anghel. Nakasulat sa mga pinto ang pangalan ng labindalawang lipi ng Israel. Tatlo ang pinto ng bawat panig: tatlo sa silangan, tatlo sa timog, tatlo sa hilaga, at tatlo sa kanluran. Ang pader ng lunsod ay may labindalawang saligang-bato at nakasulat dito ang pangalan ng labindalawang apostol ng Kordero.

Napansin ko na walang templo sa lunsod sapagkat ang Panginoong Diyos na Makapangyarihan sa lahat at ang Kordero ang pinakatemplon. Hindi na kailangan ang araw o ang buwan upang liwanagan ang lunsod pagkat ang kaningningan ng Diyos ang nagbibigay-liwanag doon, at ang Kordero ang siyang ilawan.

Ang Salita ng Diyos!
B—Salamat sa Diyos!

Aleluya Jn 14:23

B—Aleluya! Aleluya!
Ang sa aki’y nagmamahal, tutupad sa aking aral, Ama’t ako’y mananahan.
Aleluya! Aleluya!

Mabuting Balita Jn 14:23-29

Pag-ibig at katapatan kay Hesus ang mga kundisyon para sa katuparan ng kanyang pangakong siya at ang Ama ay mananatiling kasama ng kanyang mga disipulo at magsusugo sa kanila ng Espiritu Santo.

P—Ang Mabuting Balita ng Panginoon ayon kay San Juan
B—Papuri sa iyo, Panginoon!

Noong panahong iyon: Sinabi ni Hesus sa kanyang mga alagad, “Ang umiibig sa akin ay tutupad ng aking salita; iibigin siya ng aking Ama, at kami’y sasakanya at mananahan sa kanya. Ang hindi umiibig sa akin ay hindi tumutupad sa aking mga salita. Hindi akin ang salitang narinig ninyo, kundi sa Amang nagsugo sa akin.

Sinabi ko sa inyo ang mga bagay na ito samantalang kasama pa ninyo ako. Ngunit ang Patnubay, ang Espiritu Santo na susuguin ng Ama sa pangalan ko, ang siyang magtuturo sa inyo ng lahat ng bagay at magpa-paalaala ng lahat ng sinabi ko sa inyo.

Kapayapaan ang iniwan ko sa inyo. Ang aking kapayapaan ang ibinibigay ko sa inyo; hindi ito katulad ng ibinibigay ng sanlibutan. Huwag kayong mabalisa; huwag kayong matakot.

Sinabi ko na sa inyo, ‘Ako’y aalis, ngunit babalik ako.’ Kung iniibig ninyo ako, ikagagalak ninyo

ang pagpunta ko sa Ama, sapagkat dakila ang Ama kaysa akin. Sinasabi ko na ito sa inyo bago pa mangyari upang, kung mangyari na, kayo'y manalig sa akin."

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B – Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P – Nananalig na ang kapayapaan ay kaloob ng Diyos at bunga ng pagsisikap ng tao, idalangin natin ang mahalagang kaloob na ito:

B – Panginoong Hesus, ipagkaloob mo sa amin ang iyong kapayapaan!

* Para sa Simbahan, ang Kawatwan ni Kristo: Nawa maging daan siya ng pakikipagkasundo at pakikipagtulungan ng mga tao. Manalangin tayo! **B.**

* Para sa Santo Papa, mga obispo, at pari: Nawa sila ang maging kinatawan ng pagmamahal ni Kristo sa ating mundong nababalot ng pagkamakasarihan sa kawalang-malasakit. Manalangin tayo! **B.**

* Para sa mga bansang nahaha-

rap sa digmaan: Nawa maisip ng mga pinuno nila ang kawalang-saysay ng labanan at magsimula ng tapat na pakikipag-ayos para sa ikabubuti ng lahat. Manalangin tayo! **B.**

* Para sa mga mag-anak na pinaglalayo ng inggitan at iringan: Nawa maunawaan nilang tanging pagpapatawaran ang makapagbabalik ng mahalagang kapayapaan. Manalangin tayo! **B.**

* Para sa bawat isa sa atin at sa mga mahal natin sa buhay: Nawa, tulad ni San Francisco ng Assisi, tayo'y maging kasangkapan ng kapayapaan ni Kristo habang nagsisikap tayong magsabuhay ng Ebanghelyo. Manalangin tayo! **B.**

* Tahimik nating ipanalangin ang ating mga sariling kahilingan. (*Tumigil sandali.*)

Manalangin tayo! **B.**

P – Panginoong Hesus, ipaunawamo sa amin na sa pagtalima sa iyong salita, kami'y magiging kasangkapan ng iyong kapayapaan sa mundo at sa gayo'y magmana ng Kaharian ng Kapayapaan kung saan ka nabubuhay at naghahari nang walang hanggan.

B – Amen!



P – Manalangin kayo . . .

B – Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P – Ama naming Lumikha, paakyat mo sa iyong piling sa kalangitan ang aming mga panalanging kalakip ng haing mga alay upang ang mga pinagindapat mong gawing dalisay ay maging marapat na makasalo sa piging ng iyong pagmamahal sa pagmamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo ng Pagkabuhay V

P – Sumainyo ang Panginoon!

B – At sumaiyo rin!

P – Itaas sa Diyos ang inyong puso at diwa!

B – Itinaas na namin sa Panginoon!

P – Pasalamat natin ang Panginoong ating Diyos!

B – Marapat na siya ay pasalamat!

P – Ama naming makapangyarihan, tunay ngang marapat na ikaw ay aming pasalamat ngayong ipinagdiriwang ang paghahain ng Mesiyas, ang maamong tupa na tumubos sa aming lahat.

Ang katawan ng Anak mong sa krus nabayubay ay handog ng pag-ibig na walang kapantay. Ito ang paghahaing ganap mong kinalugdan. Ito ang nilunggati ng dating pag-aalay. Ang buong sarili ng Anak mong si Hesus ay inihain sa iyo upang kami'y matubos. Siya ang dambana at paring naghahandog. Siya pa rin ang tupang handog na ibinukod.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B – Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B – Sa krus mo't pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.



B – Ama namin . . .

P – Hinihiling namin . . .

B – Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B – Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.
B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahayag lamang kung walang awiting nakahanda.)

Kung ako ay mamahalin, mga utos ko'y tutupdin at sa inyo'y susuguin Patnubay sa inyong piling. Aleluya ay awitin!

Panalangin Pagkapakinabang

P– Ama naming mapagmahal,

kaming pinapagsalo mo sa pagkabuhay ng iyong Anak ay papakinabangin mong lagi sa kanyang lakas bilang bungang masagana ng dulot mong paglilitas sa pamamagitan niya kasama ng Espiritu Santo magpasawalang hanggan.

B– Amen!



P– Sumainyo ang Panginoon.

B– At sumaiyo rin!

P– Magsiyuko kayo at ipanalangin ang pagpapala ng Diyos. (Manahimik sandali.)

–Nawa'y maging instrumento kayo ng pagkakaisa at pagtutu-

lungan sa inyong pamayanan.

B– Amen!

P– Nawa'y lagi ninyong ipakita ang inyong pagmamahal sa Panginoon sa pamamagitan ng pagsunod sa Kanyang mga utos.

B– Amen!

P– Nawa'y ang inyong mga puso ay laging masunurin sa mga pahiwatig ng Banal na Espiritu.

B– Amen!

P– Pagpalain kayo ng makapangyarihang Diyos: Ama at Anak at Espiritu Santo.

B– Amen!

P– Humayo kayo sa kapayapaan upang mahalin at paglingkuran ang Panginoon.

B– Salamat sa Diyos!

Langit sa Lupa

Jess P. Balon • Isinalin sa Filipino ni Cecilia G. Valmonte, EdD

Sinumang nagsasabing **iniibig niya si Kristo ay kailangang magpatunay nito sa kanyang gawa.** Di sapat para kay Hesus ang mga pasalitang pahayag lamang ng pag-ibig at katapatan. Nais niya'y gawa. Noon pa mang nagsisimula pa lamang siya sa kanyang buhay pangmadla, binalaan na niya ang kanyang mga disipulo, “Hindi lahat ng tumatawag sa akin, ‘Panginoon, Panginoon,’ ay papasok sa kaharian ng langit, kundi yaon lamang sumusunod sa kalooban ng aking Amang nasa langit.” (Mt 7:21) Nang malaunan, ipinahayag niyang itinuturing niyang pinakamalapit na kamag-anak ang sinumang sumusunod sa kalooban ng Diyos. (Sangguniin Mc 3:35.)

Sa kanyang pahayag sa Huling Hapunan, ang pag-subok sa pag-ibig ay lalo pang personal: “Ang umiibig sa akin ay tutupad ng aking salita” (Jn 14:23). Gayundin, ang di magtapat sa kanyang salita ay nagpapatunay sa kawalan ng pag-ibig sa kanya. (Sangguniin t. 24.)

Ang pagiging tapat sa salita ni Hesus ay nangangahulugan ng pagpapahalaga rito bilang pinakadakilang yaman; **pagturing dito bilang kanyang pinakamatayog na inspirasyon sa buhay; at manindigan dito, ano man ang maging halaga nito.** Kung minsa'y malaki nga ang halaga, ngunit ang gantimpala naman ay lalo pang malaki. Pagpapalain ng Diyos ang mga sumasampalatayang natutong magsabuhay ng salita ni Kristo. Sa gayon, ang buhay nila'y magkakamit ng bagong dimensiyon – ang dimensiyon ng **pakikipag-isa sa Ama, Anak, at Espiritu ng Pag-ibig.** Magtatamasa sila ng diwa ng kalangitan dito pa man sa buhay na ito.

Kung sa bagay, ito ay “patikim” lamang, pagkat ang kabuuan ng langit ay di saklaw ng panahon at kalawakan.

Ngunit ito ay magiging tunay pa ring patikim at sa bisa nito'y pupuspin ang “tunay na sumasampalataya” ng banal na kaningningang buhat sa kaluwalhatian ng Ama (sangguniin Pah 21:23), maliwanag na pagkaunawang hango sa presensiya ng Espiritu (sangguniin Jn 14:26), at kapayapaang likha ng kaloob ng Anak sa ating mga puso (sangguniin Jn 14:27).

Lahat ng ito ay nagdudulot ng pambihirang karan- galan para sa bawat tao. Dakila ang tao dahil sa kanyang karunungan, moral at masining na kakayahan, at tawag sa kanya ng Diyos. **Bawat tao ay dakila sapagkat siya ay maaaring maging templo ng Banal na Santatlo sa buhay na ito.** Ang kundisyon para magbunga ang ganitong potensiyal, ayon kay Hesus mismo, ay:

- * upang buksan ang puso ng isang tao sa kanya sa mababang pananampalataya,
- * ibigin siya at
- * maging tapat sa kanyang salita.

Saka sasapit ang langit at ang mga **puso ng mga tao ay magiging pinakabanal na dambanang pinananahanan ng Ama, Anak, at Espiritu.**

MAKINIG sa Radyo Totoo (846 kHz) tuwing Sabado ng hapon, ika-5:00– 6:00, at makibahagi sa

“BISPERAS SA VERITAS”

Maaari rin mapanuod sa DZRV 846

FACEBOOK PAGE

Bisitahin din ang BISPERAS SA VERITAS

FACEBOOK PAGE



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8894-5241; 8475-8945 • Website: www.wordandlife.org

• E-mail: wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Fr. B. Nolasco, J. Domingo, M. Vibiesca, V. David, D. Daguio

• Illustrations: A. Sarmiento, B. Cleofe • Circulation: R. Saldua